

全唐诗卷八百三十六

卷 836_1

【春】贯休

自来自去动洪炉，无象无私无处无。
回雁不多消气力，染花应最费工夫。
溟濛便恨豪家惜，浓暖深为政笔驱。
莫讶相逢只添睡，伊余心不在荣枯。

卷 836_2

【闻迎真身】贯休

四海无波八表臣，恭闻今岁礼真身。
七重锁未开金钥，五色光先入紫宸。
丹凤楼台飘瑞雪，岐阳草木亚香尘。
可怜优钵罗花树，三十年来一度春。

卷 836_3

【灞陵战叟】贯休

剑刃秋水鬓梳霜，回首胡天与恨长。
官竟不封右校尉，斗曾生挟左贤王。
寻班超传空垂泪，读李陵书更断肠。
今日灞陵陵畔见，春风花雾共茫茫。

卷 836_4

【遇道者】贯休

鹤骨松筋风貌殊，不言名姓绝荣枯。
寻常藜杖九衢里，莫是商山一皓无。
身带烟霞游汗漫，药兼神鬼在葫芦。
只应张果支公辈，时复相逢醉海隅。

卷 836_5

【赠钟陵陈处士】贯休

否极方生社稷才，唯谭帝道鄙梯媒。
高吟千首精怪动，长啸一声天地开。
湖上独居多草木，山前频醉过风雷。
吾皇仄席求贤久，莫待征书两度来。

卷 836_6

【怀邻叟】贯休

常思东溪庞眉翁，是非不解两颊红。
桔槔打水声嘎嘎，紫芋白薤肥濛濛。
鸥鸭静游深竹里，儿孙多在好花中。
千门万户皆车马，谁爱如斯太古风。



卷 836_7

【赠轩辕先生】贯休

曾亲文景上金銮，语共容城语一般。
久向红霞居不出，若非清世见应难。
满炉药熟分仙尽，几局棋终看海干。
略问先生真甲子，只言弟子是刘安。

卷 836_8

【偶作因怀山中道侣】贯休

是是非非竟不真，桃花流水送青春。
姓刘姓项今何在，争利争名愁杀人。
必竟输他常寂默，只应赢得苦沈沦。
深云道者相思否，归去来兮湘水滨。

卷 836_9

【送新罗人及第归】贯休

捧桂香和紫禁烟，远乡程彻巨鳌边。
莫言挂席飞连夜，见说无风即数年。
衣上日光真是火，岛旁鱼骨大于船。
到乡必遇来王使，与作唐书寄一篇。

卷 836_10

【送新罗衲僧】贯休

扶桑枝西真气奇，古人呼为师子儿。
六环金锡轻摆撼，万仞雪峤空参差。
枕上已无乡国梦，囊中犹挈石头碑。
多惭不便随高步，正是风清无事时。

卷 836_11

【春晚桐江上闲望作】贯休

江上车声落日催，纷纷扰扰起红埃。
更无人望青山立，空有帆冲夜色来。
沙鸟似云钟外去，汀花如火雨中开。
可怜潇酒鸥夷子，散发扁舟去不回。

卷 836_12

【商山道者】贯休

五千言外得玄音，石屋寒栖隔雪林。
多傍松风梳绿发，只烧崖药点黄金。
澄潭龙气来萦砌，月冷星精下听琴。
曾梦先生非此处，碧桃溪上紫烟深。

卷 836_13

【闻许棠及第因寄桂雍】贯休



时清道合出尘埃，清苦为诗不仗媒。
今日桂枝平折得，几年春色并将来。
势扶九万风初极，名到三山花正开。
更有平人居蛰屋，还应为作一声雷。

卷 836_14

【灊江秋居作】贯休

无事相关性自摅，庭前拾叶等闲书。
青山万里竟不足，好竹数竿凉有馀。
近看老经加澹泊，欲归少室复何如。
面前小沼清如镜，终养琴高赤鲤鱼。

卷 836_15

【上缙云段使君】贯休

清畏人知人尽知，缙云三载得宣尼。
活民刀尺虽无象，出世文章岂有师。
术气芝香粘瓮榼，云痕翠点满旌旗。
今朝暂到金台上，颇觉心如太古时。

卷 836_16

【春末兰溪道中作】贯休

山花零落红与绯，汀烟濛茸江水肥。
人担犁锄细雨歇，路入桑柘斜阳微。
深喜东州云寇去，不知西狩几时归。
清平时节何时是，转觉人心与道违。

卷 836_17

【野居偶作】贯休

高淡清虚即是家，何须须占好烟霞。
无心于道道自得，有意向人人转赊。
风触好花文锦落，砌横流水玉琴斜。
但令如此还如此，谁羨前程未可涯。

卷 836_18

【再游东林寺作五首】贯休

台殿参差耸瑞烟，桂花飘雪水潺潺。
莫疑远去无消息，七万馀年始半年。
桓玄旧辇残云湿，耶舍孤坟落照迟。
有个山僧倚松睡，恐人来取白猿儿。
玉像珠龕香阵横，锦霞多傍石墙生。
辟蛇行者今何在，花里唯闻鸠鸟声。
爱陶长官醉兀兀，送陆道士行迟迟。
买酒过溪皆破戒，斯何人斯师如斯。
白薝卜花露滴滴，红苾刍草香濛濛。



田地更无尘一点，是何人合住其中。

卷 836_19

【题兰江言上人院二首】贯休

一生只著一麻衣，道业还欺习彦威。
手把新诗说山梦，石桥天柱雪霏霏。
只是危吟坐翠层，门前岐路自崩腾。
青云名士时相访，茶煮西峰瀑布冰。

卷 836_20

【中秋十五夜月】贯休

噀雪喷霜满碧虚，王孙公子玩相呼。
从来天匠为轮足，自是人心此夜馀。
静入万家危露滴，清埋众象叫鸿孤。
坐来惟觉情无极，何况三湘与五湖。

卷 836_21

【鹭鸶有怀（前东阳王慔使君养一鹭鸶名瑶花）】贯休

粉魄霜华为尔枯，鸳鸯相伴更堪图。
爱来沙岛遗银屋，终作金笼养雪雏。
栖宿必多清濑梦，品流还次白猿徒。
今朝不觉频回首，曾伴瑶花近玉壶。

卷 836_22

【东阳罹乱后怀王慔使君五首】贯休

昨来只对汉诸侯，胜事消磨不自由。
裂地鼓鼙军口急，连天烽火阵云秋。
砍毛淬剑虽无数，敌血为盟不到头。
谁为今朝奉明主，使君司户在隋州。
只报精兵过大河，东西南北杀人多。
可怜白日浑如此，来似蝗虫争奈何。
天意岂应容版乱，人心都改太凋讹。
不胜惆怅还惆怅，一曲东风月胯歌。
为郡无如王使君，一家清冷似云根。
货财不入崔洪口，俎豆尝闻夫子言。
须发坐成三载雪，黎氓空负二天恩。
不堪西望西风起，纵火昆仑谁为论。
魄慑魂飞骨亦销，此魂此魄亦难招。
黄金白玉家家尽，绣闼雕甍处处烧。
惊动乾坤常黯惨，深藏山岳亦倾遥。
恭闻国有英雄将，拟把何心答圣朝。
不是龚黄覆育才，即须清苦远尘埃。
无人与奏吾皇去，致乱唯因酷吏来。
剝剥生灵为事业，巧通豪猾作梯媒。



令人转忆王夫子，一片真风去不回。

卷 836_23

【秋夜怀嵩少因寄洛中旧知】贯休

炉爇旃檀不称贫，霏霏玉露湿禅巾。
紫金地上三更月，红藕香中一病身。
少室少年偏入梦，多时多事去无因。
如今憔悴头成雪，空想嵯峨羨故人。

卷 836_24

【避地毗陵，寒月上孙徽使君兼寄东阳王使君三首】贯休

一到毗陵心更劳，冷吟闲步拥云袍。
岂缘思妙尘埃少，自是风清物态高。
野色疏黄连楚甸，故山奇碧隔河桥。
终须愚谷中安致，不是人间好羽毛。
常忆双溪八咏前，讲诗论道接清贤。
文欺白凤真难及，药撚红蕖岂偶然。
花湿瑞烟粘玉磬，帘垂幽鸟啄苔钱。
自怜不是悠悠者，吟嚼真风二十年。
□雷车雨滴阶声，寂寞焚香独闭扃。
锦绣文章无路达，袴襦歌咏隔墙听。
松声冷浸茶轩碧，苔点狂吞纳线青。
唯有孤高江太守，不忘病客在禅灵。

卷 836_25

【秋末寄上桐江冯使君】贯休

山东山色胜诸山，谢守清高不可攀。
薄俗尽于言下泰，苦心唯到醉中闲。
香凝锦帐抄书后，月转棠阴送客还。
野客沾恩归未得，萧萧霜叶满柴关。

卷 836_26

【禅师】贯休

击鼓求亡益是非，木中生火更何为。
吾师别是醍醐味，不是知心人不知。

卷 836_27

【道士】贯休

花岛相逢满袖云，藉花论道过金巾。
腾腾又入仙山去，只恐是青城丈人。

卷 836_28

【风琴】贯休

至境心为造化功，一枝青竹四弦风。

寥寥双耳更深后，如在缑山明月中。

卷 836_29

【庭橘】贯休

蚁踏金苞四五株，洞庭山上味何殊。
不缘松树称君子，肯便甘人唤木奴。

卷 836_30

【落花】贯休

蝶醉蜂痴一簇香，绣葩红蒂堕残芳。
因嗟好德人难得，公子王孙尽断肠。

卷 836_31

【孤云】贯休

将比鹭鸶还恐屈，始思残雪不如多。
清风相引去更远，皎洁孤高奈尔何。

卷 836_32

【苦吟】贯休

河薄星疏雪月孤，松枝清气入肌肤。
因知好句胜金玉，心极神劳特地无。

卷 836_33

【古战处】贯休

鬼气苍黄棘叶红，昔时人血此时风。
相怜极目无疆地，曾落将军一阵中。

卷 836_34

【偶然作】贯休

蝉声引出石中蛩，寂寞门扃叶数重。
谁道思山心不切，等闲尽出两三峰。

卷 836_35

【招友人宿】贯休

银地无尘金菊开，紫梨红枣堕莓苔。
一泓秋水一轮月，今夜故人来不来。

